

ILUARSISSUT

Taarserpaa inatsisissatut siunnersuut 11. August 2016-imeersoq.
 (§ 42c, imm. 6-imi, § 42f, imm. 1 aamma 2-mi § 42b, imm. 1-imut innersuussineq
 ilanngunneqarpoq, kalaallisoortumilu oqaatsit taaguutillu qulequtaani, ataatigut
 oqaasiliussami aallaqqaassiummilu iluarsisooqarpoq kiisalu §§ 42a - 42j).

**Uunga siunnersuut: Atuarfik pillugu Inatsisartut inatsisaata allanngortinneqarneranik
 Inatsisartut inatsisaat nr. xx, xx xx 2016-imeersoq**

(Atuarfik pillugu angajoqqaat nuna tamakkerlugu siunnersuisooqatigiivini pilersitsineq)

§ 1

Atuarfik pillugu Inatsisartut inatsisaat nr. 15, 3. december 2012-imeersoq imatut
 allanngortinneqarpoq:

1. § 42-p kingorna kapitalitut nutaatut ilanngunneqarpoq:

“Kapitali 8a

Atuarfik pillugu angajoqqaat nuna tamakkerlugu siunnersuisooqatigiivi

§ 42a. Atuarfik pillugu angajoqqaat nuna tamakkerlugu siunnersuisooqatigiivini pilersitsisoqassaaq. Siunnersuisooqatigiit kommuninit tamanit inunnik marlunnik tamarmik immikkut meeqqamut atuarfimmi allatsissimasumut angajoqqaatut oqartussaassuseqartunik paarisaqarnissamilluunniit akuersissuteqartunik ilaasortaqaassaaq.

Imm. 2. Siunnersuisooqatigiit suliassaraat:

- 1) atuarfimmi pitsaassutsip qaffassarnissaa siunertaralugu inassuteqaateqartarnek, tassunga ilanngullugu pitsaassutsit pillugit nalunaarusianut tunngatillugu,
- 2) tusarniaanerni akissuteqartarnek,
- 3) atuarfinni siulersuisut sulineranni siunnersuisarnek tapersiisarnerlu,
- 4) atuarfimmi pitsaassuseq pillugu ineriartortitsinermi suliniutini peqataasarneq, aamma
- 5) angajoqqaat atuarfimmi peqataatinneqartarnerannut pitsaasumik suleriaaseq pillugu ilisimasanik paarlaasseqatigiittarneq.

Imm. 3. Siunnersuisooqatigiit Inatsisartut inatsisaani uani killiliussat iluanni allanik suliaqarsinnaavoq.

Imm. 4. Siunnersuisooqatigiit ukiumut minnerpaamik sisamariarluni ataatsimiittassaaq. Ataatsimiinnerit tamanut ammasuunngillat. Oqaluuserisassat ataatsimiinnernilu imaqarniliat avammut saqqummiunneqartassapput. Inuit pillugit paasissutissat mianernartut annertuumik isiginiarneqarnissaat tamassumunnga tunngavissaqartitsippata ullormut oqaluuserisassat imaqarnilialluunniit isertuunneqassanersut isumalioqatigiissitaq aalajangersinnaavoq.

Imm. 5. Suleriaaseq siunnersuisoqatigiit nammineq aalajangersassavaat, taannalu ataatsimiittarnerit, taasisarnermut malittarisassat, suliamut attuumassuteqarpallaarneq imaqarniallu pillugit malittarisassanik imaqassaaq.

§ 42b. Siunnersuisoqatigiinni ilaasortat kommunini ataasiakkaani ilaasortassanik marlunnik inuit meeqqanut atuarfimmi allatsissimasunut angajoqqaatut oqartussaassusillit imaluunniit paarsinissamut akuersissuteqartut toqqaannartumik qinersinerisigut qinerneqartassapput, taamaalilluni kommunini ataasiakkaani atuarfinit ikinnerpaamik 100-nik atuortoqartunit ilaasortamik ataatsimik aamma atuarfinit 100 inorlugit atuortoqartunit ilaasortamik ataatsimik qinersisoqartassalluni.

Imm. 2 Piffissaq qinigaaffik kingusinnerpaamik qaammammik ataatsimik sioqqullugu siunnersuisoqatigiinnut qinersisoqartassaaq.

Imm. 3. Qinersinerit kommunini tamani kommunalbestyrelsimit qinersinernik piareersaassamik ingerlatsisussamillu qinersinermut siulersuisunik pilersitsisinnaasumik piareersarneqartassapput, aqunneqartassapput ingerlanneqartassallutillu.

§ 42c. Siunnersuisoqatigiinnut § 42a, imm. 1 naapertorlugu angajoqqaq kinaluunniit nammineersinnaassusilik qinersinerlu sioqqullugu sivikinnerpaamik qaammatini arfinilinni Kalaallit Nunaanni aalajangersimasumik najugaqarnikoq ukiullu tallimat kingullit ingerlaneranni pinerluttulerinermi pineqaatissiinermi inaarutaasumik eqqartuussaasimanngitsoq akiliisussanngortinneqarsimannngitsorluunniit ukiulluunniit kingullit pingasut ingerlaneranni ulloq qinersiviusoq naatsorsuinermi aallaavigalugu isumalioqatigiissitani ilaasortaanissamut nalinginnaasumik tusaamaneqarnermi naleqqukkunnaarsitsisumik pinerluttulerinermi pineqaatissinneqarsimanngitsoq qinigaasinnaavoq. Kommunalbestyrelsinut, nunaqarfinni aqutsisunut ilagiillu sinniisaannut qinersisarnerit pillugit Inatsisartut inatsisaat naapertorlugu qinigaasinnaanermut ataatsimiititaliap Naalakkersuisunit pilersinneqarsimasup aalajangiiffigissavaa qinigaasoq pinerluuteqarsimaneq peqputigalugu pineqaatissinneqarsimasoq qinigaasinnaatitaassannginnersoq.

Imm. 2. Siunnersuisoqatigiinnut ilaasortat Inatsisartunut, Folketingimut kommunalbestyrelsinulluunniit ilaasortaanngillat qineqqusaartuussanatilluunniit aammalu atuarfinit ingerlatsivimmi imaluunniit soqutigisaqatigiiffinni meeqqat atuarfiannik suliaqartuni sulisuussanani.

Imm. 3. Ilaasortat piffissamut ukiunut sisamanut qinigaasassapput, siullerpaamik piffissamut 1. juli 2017-imiit 30. juni 2021-mut. Ilaasortat tamarmik piffissap qinigaaffiup naanerani tunuassapput.

Imm. 4. Siunnersuisoqatigiinnut siulittaasoq siunnersuisoqatigiinni ilaasortat akornanni ilaasortanit qinerneqartassaaq. Siulittaasumik qinersinermi taasinerit amerlaqatigiippata qinigassanngortittut akornanni makitsinikkut siulittaasutut qinigaasoqartassaaq.

Imm. 5. Ilaasortat amerlanerussuteqartut ikinnerpaamik 2/3-iisa siulittaasoq assersuutigalugu annertuumik suleqataaangippat allatulluunniit siulittaasuunissamik naleqqukkunnaarpat piffissap qinigaaffiup ingerlanerani tunuartissinnaavaat. Ilaasortat piaarnerpaamik siulittaasumik nutaamik qinersissapput.

Imm. 6. Ilaasortaq piffissap qinigaaffiup ingerlanerani imm. 1-imi taaneqartunik pinerlunnernut pineqaatissinneqarpat imaluunniit imm. 2-mi taaneqartunik suliaqalerpat ilaasortaq siunnersuisoqatigiinniit ingerlaannarluni tunuassaaq, tamassumalu kingorna atuarfiit immikkoortuisa assingani, tak. § 42b, imm. 1 qinigassanngortissimasoq qinigaanikuunngitsorli amerlanerpaanillu qinersisulik siunnersuisoqatigiinni ilaasortaalissaaq. Tamanna aamma atuuppoq ilaasortaq kommunimit qinigaaffimmit nuuppat. Imm. 1, 2-mi qinigaasinnaanermut ataatsimiititaliap imm. 1, oqaaseqatigiit aappaanni taaneqartup aalajangissavaa pinerlussimanermut pineqaatissiissutaasimasoq ima pissuseqarnersoq ilaasortaq imm. 1 malillugu siunnersuisoqatigiinnit tunuartitaassalluni.

Imm. 7. Siunnersuisoqatigiinni ilaasortap meeraa atuarfimmi allatsissimajunnaarpat ilaasortajunnaarnissamik piumasaqarsinnaavoq. Qinigaajunnaanermut ilaasortajunnaanermullu kommunalbestyrelsinut, nunaqarfinni aqutsisunut ilagiillu sinnissaannut qinersisarnerit pillugit Inatsisartut inatsisaanni aalajangersakkat aamma atuupput.

§ 42d. Inuit siunnersuisoqatigiinnut qinigassanngortinnissaminnik kissaateqartut piffissaq qinersiviususaaq kingusinnerpaamik sapaatit akunnerinik sisamanik sioqqullugu qinigassanngortinnertik kommunalbestyrelsimut nalunaarutigissavaat.

Imm. 2. Nalunaaruteqarnek qinigassanngortittup aqqanik, atorfianik meeqqallu atuarfiani sorlermi qinigassanngortittup meeraa allatsissimaneranik paasissutissanik imaqassaaq.

Imm. 3. Piffissaq nalunaaruteqarfissaq naaniariartoq nalunaarutit tiguneqartut atorsinnaasutut akuerineqassanersut kommunalbestyrelsi aalajangiissaaq tamassumalu kingorna qinigassanngortittut ingerlaannaq nalunaarfigissallugit.

Imm. 4. Qinigassanngortittut aqqi kommunalbestyrelsip piaarnerpaamik avammut nalunaarutigissavai.

Imm. 5. Siunnersuisoqatigiinnut ilaasortanik qinersisarneq pillugu Naalakkersuisut annertunerusunik malittarisassiorsinnaapput.

§ 42e. Qinersinerinerit pisassapput qinersivissaq naqiteriigaq, siumut taaguummik ”Atuarfik pillugu angajoqqaat nuna tamakkerlugu siunnersuisoqatigiivinut qinersineq”-mik qulequtserneqarsimasoq, kalaallisut danskisullu allanneqarsimasoq atorlugu.

Imm. 2. Qinersinerit inimi kommunalbestyrelsip innersuussaani pisassapput.

Imm. 3. Imm. 2 naapertorlugu sumiiffinnut qinersiviusussanut tamanut qinersivissat naammattut pissarsiarinissaat agguataarnissaallu kommunalbestyrelsip akisussaaffigivaa.

Imm. 4. Kommunalbestyrelsi isumalioqatigiissitamut qinersinermut immikkut atugassamik qinersinermi allaffissannut nakkartitsivissanik pissarsissaaq.

§ 42f. Qinersinernik kisitsinermi angajoqqaq kommunini ataasiakkaani atuarfiit immikkoortuini ataasiakkaani, tak. § 42b, imm. 1, amerlanerpaanik qinerneqartoq qinigaassaaq.

Imm. 2. Amerlaqatigiinnik qinersisoqartoqassappat makitsinikkut kina qinigaanersoq aalajangerneqassaaq. Makitsineq kommunalbestyrelsimit ingerlanneqassaaq.

Imm. 3. Kommunalbestyrelsit ataasiakkaat sinniisussat allattorsimaffiannik suliaqassapput, tassani angajoqqaat qinigaanngitsut atuarfiit immikkoortuinit tunngatillugu qinerneqarnerisa amerlassusaat malillugu tulleriinnilersorlugit allanneqassallutik, tak. § 42b, imm. 1.

§ 42g. Siunnersuisoqatigiit sulinerat, tassunga ilanngullugit allatseqarnissamik inniminniineq kiisalu aningaasartuutit imm. 3-mi 4-milu taaneqartut, nunatta karsianit tapiissuteqarnikkut aningaasalersorneqassaaq.

Imm. 2. Nunatta karsianit ukiumoortumik tapiissutit ukiumi aningaasanut inatsiseqarfiusumi tullermi aningaasanut inatsisip akuerineqarneranut atatillugu Inatsisartunit aalajangerneqartassaaq.

Imm. 3. Naalackersuit siunnersuisoqatigiinni ilaasortat akissarsiaat aamma ilaasortat aningaasartuutaannik, tassunga ilanngullugit ilaatigut angalanernut, nerisaqarnermut najugaqarnermullu aningaasartuutinik, taartisiaqartarneq pillugit malittarisassiussapput.

Imm. 4. Siunnersuisoqatigiit siulittaasuat sulinerminut Namminersorlutik Oqartussat qitiusumik allaffeqarfianni allaffimmi pisortat akissarsiaasa assinganik akissarsiaqartinneqassaaq.

Imm. 5. Tapiissutit ilaasa imm. 2-mi taaneqartut siunnersuisoqatigiinnik qinersisarneq pillugu paasissutissianut killilimmik atorneqartarnissaat pillugu Naalackersuisut malittarisassiorsinnaapput.

§ 42h. Siunnersuisoqatigiit, nunatta karsiata tapiissutaasa annertussusissaannik, tassunga ilanngullugit ukiumi aningaasanut inatsiseqarfiusumi tullermi missingersuutinut, Naalackersuisut piffissaritatut aalajangigaasa iluanni siunnersuusiortassapput.

§ 42i. Siunnersuisoqatigiit ukioq naatsorsuuserfiat tassaavoq ukioq aningaasanut inatsiseqarfiusoq. Missingersuutit, naatsorsuuserineq naatsorsuutinillu saqqummiisarneq pillugit Namminersorlutik Oqartussat aalajangersagaat qaqugukkulluunniit atuuttut siunnersuisoqatigiit malissavaat.

Imm. 2. Ukiumoortumik naatsorsuutit Namminersorlutik Oqartussat kukkunersiuisuannit kukkunersiorneqartassapput.

Imm. 3. Ukiumoortumik naatsorsuutit siunnersuisoqatigiit akuerisaat Naalackersuisut piffissaritatut aalajangigaasa iluanni siunnersuisoqatigiit Naalackersuisunut akuerineqartussanngorlugit saqqummiuttassavaat.

Imm. 4. Naatsorsuutit Naalackersuisunit akuerineqareeraangata siunnersuisoqatigiit

avammut saqqummiuttassavaat.

§ 42j. Ukiup aningaasanut inatsiseqarfiusup naanerani siunnersuisoqatigiit ukiumi qaangiuttumi sulinertik pillugu nalunaarusiortassapput. Nalunaarusiaq Naalakkersuisunut nassiunneqartassaaq taakkualu saqqummersittassavaat.

Imm. 2. Nalunaarusiat ilaatigut siunnersuisoqatigiit ukiumi qaangiuttumi suliarisimasaannik sulisimanerannillu imaqtartassapput. Ilaasortat tamarmik piffissap qinigaaffiup naanerani tunuassapput”.

§ 2

Inatsisartut inatsisaat ulloq 1. januar 2017 atuutilersinneqarpoq.

Namminersorlutik Oqartussat, ulloq xx.xx. 2016

Kim Kielsen